

Kooba e nagge

- Wonnoo dōo ko kooba.

Nagge yehi ladde tawi toon kooba. Kooba wii : « Aan dey, mi yi'ataa ma jamma e ladde hee. » Nagge wii : « Miin ko mi jeyaado. Mi nyallan nyaamde e ladde, so hiirii mi joftoya to joomam. » Kooba wii : « Mo jey-maa ? » Nagge wii : « Joomam woni ko wuro. » Kooba wii : « Ko o nafan-maa ? » Nagge wii : « So mi joftii, joomam human kam e boggol, o bira mi, jango subaka o bira mi, so o gaynii birde mi, o sogga mi, mi yaha ladde, mi nyalla nyaamde haa hiira, mi arta. »

Kooba wii : « Ko aan jaasi ! Yeew tan ko aan nyamminta hoore maa, aan jofnata hoore maa, so a yettiima kumedaa e boggol, doon kuwataa, doon coofataa, so joome ari tan bir-maa ? Ko a kuutorgal tan, aan fuuyi !... Miin mi jabataa dum, hay gooto halfaani mi, dō mbelaami nyallanmi, dō mbelaami mbaalanmi, ko weli mi nyaamanmi. »

Hiiri. Nagge wii : « Kooba, jooni dey hiirii mbida hoota. » Kooba wii : « Mbaalen dōo, so a woowii jeyde hoore maa, a wontaa jaɓ halfeede. » Nagge wii : « So mi waalii dōo, ko jenggi fof, joomam aranan kam. Duum noon, mi yahan tan. So wonaa dūum, so o tawii kam dōo, o fiyan kam. » Kooba wii : « Haadi ko a puuydō ! Ada jaba jeyeede, saka noon kabboowo ma e boggol ! »

Kooba ina yenna nagge tan, haa baanyoowo yii nagge ina wondi e kooba. Tan baanyoowo naati e jeeje, dacci haa nagge benni, kooba sawndii dum, tan fawi serdu e wuttulo kooba. O aari ngelooaba haa ajjii, o foodi rawaandu, kapsinaaji petti, kure mbii e wuttulo kooba pat ! Kooba wadi tuguperi, ba oondi.

Nagge ari tawi kooba ina fettoo. Nagge wii : « A yi'ii, kala mo alaa jeydō, ko bone warata dum. Miin kay, hay so a feesii baanyoowo, suusaa fellude mi. Aan wonnoo a alaa jeydō, baanyoowo warii ma, nawana sukaabe mum pijira teewu maa. Miin, so baanyoowo fellii kam, shari'a mum e joomam gasataa ! »